

東

華

錄

東華錄

康熙三

臣王先謙敬編

臣周瀚蕃恭校

康熙二年癸卯春正月壬午諭兵部凡查解逃人有主認識始行照例擬罪今見靈壽縣所解逃人李大增督捕傳撥什庫七人到部俱不認識卽李大增自供並地方十家長俱云並未投充滿洲李大增明係民人督捕不行審明卽議李大增等入官李九山等流徙恐屬冤枉且陳氏等七人何以盡斃於獄爾部卽將該縣典史楊煦快役高應正溫起家並出首李大增之高萬臣作速差人提取到部請旨定奪○丙戌吏部以通州知州倪嘉賓等失迎詔書分別議處得旨頒送詔書豈可不論地方遠近槩令迎接其入城經過及駐宿城池有前站者作何迎送失誤者作何處分著再

定議具奏○設廣西泗城軍民府流官同知經歷儒學教授等官

○戊子以許纘曾爲河南按察使

由四川東道遷

○己丑兵部奏凡機

密事務應令專官收掌請添設滿郎中員外各一員協同漢主事辦理從之○己亥廣東總督盧崇峻奏請大兵往來封借商民船隻不許○是月免河南陳留湖廣荊門等十八州縣去年水災賦二月庚子朔停止六部漢司官內升京堂例○壬寅湖廣提督董學禮奏前奉命會勘湖廣西山巨寇李來亨馬騰霄党守素等隨同鄖陽總兵官穆生輝襄陽總兵官于大海辰常總兵官高守貴統領官兵三萬人鑿山開道以正月初五日進至李家店遇賊兵萬餘人各路奮擊斬馘過半生擒僞總兵宋段獲旗幟器械無算賊黨焚巢遁走又別遣夷陵鎮將恢復歸州巴東巫山等處直達夔州並撫輯各處洞寨得旨嘉獎下部議敘○丙午御史張吉午

奏三年考滿之法一二等稱職者卽係薦舉應將督撫二年薦舉一次之例槩行停止從之○丁未陝西總督白如梅奏提督王正率興安總兵官于奮起河北總兵官鮑敬進剿逆賊郝搖旗至房縣橫水地方僞羅軍門將萬餘人拒戰大敗之殺賊兵無算生擒賊一百七十三人徇於軍大獲盔甲器械下部察敘○庚戌亥刻 慈和皇太后崩先是 慈和皇太后違豫 上朝夕虔侍親嘗湯藥目不交睫衣不解帶及大漸 上憂悴弗勝寢膳俱忘輔臣近侍等見 聖容清減請 上節勞少休不允時 太皇太后以 慈和皇太后疾軫念日切 上數詣 慈甯宮請安強歛戚容冀慰 聖懷退輒涕泗交頤至是 慈馭上賓 上擗踊哀號水漿不御哭無停聲近侍無不感泣○癸丑宣 大行慈和皇太后哀詔○甲寅遣官頒詔天下自詔到日爲始持服二十七日○

丁巳兵部議准平西王吳三桂奏請將雲貴二省總督巡撫敕書
撰入聽王節制四字從之○戊午授投誠僞侯陳豹爲慕化伯給
三等伯俸○初設四川雲陽等處水師總兵官以向化侯譚詣爲
之○己未以吳嵩印爲湖廣按察使由湖北道遷耶永清爲山東按察
使由荆南道遷○庚申奉移 大行慈和皇太后梓宮安奉壩上 享

殿 梓宮啓行 上奠酒行禮攀號益切 太皇太后 仁憲皇

太后念 上冲齡荷 宗社之重不便遠離紫禁親送 梓宮頻

降 懿旨諭止 上雖勉遵 慈諭仍哭踊不輟○兵部議覆廣

東鎮海將軍王國光奏總兵官許龍標下官兵奪獲賊船生擒僞
都督邵應祚殺賊八十餘名擒賊夥十三名爲數無多例不議敘
應令該督酌量獎賞以示鼓勵得旨據奏官兵入海奪獲賊船生
擒僞都督爾部比照陸地以擒殺無多不准議敘不合仍著議敘

具奏○壬戌封土默特鎮國公古睦爲貝子○吏部遵旨議覆凡
頒詔官經過駐宿及五里內府州縣衛所各官俱迎出城跪道右
候詔過臨行出送亦如之違者降二級留任其路旁五里以外官
不得迎送從之○平西王吳三桂奏請雲南提督駐紮大理府從
之○甲子廣西總督于時躍奏安南國王黎維祺薨王嗣黎維禧
繼襲進本告哀○乙丑工部奏臣部司官差繁額少不敷料理請
補設缺額司官三員增設司官八員從之○漕運總督林起龍奏
淮安羣盜鈕思塘王海雲等阻水結黨出沒黃河洪澤等湖二十
餘年殺掠商民搶奪婦女截劫解部顏料船隻非他盜可比頃嚴
督文武官四布緝捕相繼就擒鈕思塘等應駢斬餘流徙決杖有
差得旨三法司覈擬具奏○貴州總督楊茂勳奏丹平土官莫之
廉前於康熙元年二月內擅用坐纛旗幟盔甲與官兵接戰二次

又窩藏叛逆劉鼎訛言煽惑聚眾弄兵爲謀叵測隨會同提督李本深遣官兵分路擒剿莫之廉擁眾高巖弩矢亂發官兵奮勇進攻前後斬賊六百四十六級生擒莫之廉並其妻妾子女莫之廉自知罪大絕食死請將行間勦力諸臣分別議敘下部察敘○是月免河南陳留湖廣荊門等十八州縣去年水災賦

三月己巳朔命廣東總督移駐廣州府○四川總督李國英奏進勦昌甯直搗逆巢渠寇袁宗第乘夜遁去當陣殺死僞總兵以下六十餘員招降僞新化伯馮起鳳僞總兵黃守庫等得旨事平察敘○癸酉兵部議覆平西王吳三桂奏僞右都督馬思良自邊外率眾投誠應授職銜並僞總兵胡順等以下各員均應請敘賞賚給俸應如所請其餘令該藩安插得所得旨馬思良著授右都督職銜餘依議○甲戌吏部遵旨議覆嗣後由吏員例監准貢出身

者俱准升正印得旨納銀授官於理不合以後吏員年滿果勤勞無過准其考職免納銀兩其納銀例監准貢以後亦著停止○戊寅以考滿加左都御史魏裔介太子太保○辛巳給事中薛奮生奏在內部院大臣在外督撫爲庶官表率黜陟之典不可不嚴近停止京察專行考滿法誠至善但有歷俸及期得與考滿者亦有因降級罰俸逾期不得與考滿者使降級罰俸者必待復級並扣除月日而後考滿則新舊參罰牽連積日累月終無考滿之期是無過者方慄三載考績之條而有過者反借爲優游藏拙之地請將降級罰俸者不必待其復級並扣除月日計歷任三年卽據實自陳著爲定例下部議○四川總督李國英奏故僞岐侯賀珍子僞富平伯賀道甯率所部納款下部議敘○癸未調蔣赫德爲內國史院大學士

由內宏文院大學士調

○乙

子故戶部尙書甯古禮祭葬

謚勤敏○庚寅裁江南揚州府船政同知○壬辰荷蘭國遣出海王統領兵船至福建閩安鎮助剿海逆又遣其戶部官老磨軍士丹鎮總兵官巴連衛林等朝貢 上嘉之各賜銀幣有差○甲午裁江南蘇松兵備道○裁貴州思石兵巡道歸思仁守道兼理○以輔臣公鰲拜子那摩佛爲領侍衛內大臣○是月免江南青浦十二縣江甯前衛等十五衛旱災逋賦有差

夏四月庚子追封靖南王耿繼茂生母郭氏爲妃○辛丑湖廣總督張長庚奏提督董學禮同各鎮將等由魚刺坡進抵長坪於三月初九初十日大破逆賊李來亨擒殺賊黨攻進雙龍觀三白埡二關逆賊焚巢遁走下部知之○戊申原任廣州府通判屠彪子屠之煥爲僞總兵董方策所執不屈死命照外委官殉難例賜卹○甲寅大學士成克鞏以病乞假令解任調理○敘勦平貴州逆

苗王應兆功加總督楊茂勳兵部尙書○乙卯添設滿漢御史各

一協理河南道事○免順治十八年浙江旱災賦已完者抵康熙

元年額賦○丙辰以黃志遴爲貴州左布政使原任雲南左布政使徐國相

爲山東右布政使由郎中遷○辛酉奉移 世祖章皇帝寶宮往 孝

陵先是諸王大臣引古禮止 駕遠送 上未允至是以 太皇

太后懿旨諄切 上不得已勉遵 慈命○乙丑陝西提督王一

正奏三月二十五日進剿郝搖旗於張老河擒斬賊黨奪獲器械

逆賊焚巢遠遁下部知之○是月免山東福建二省被災州縣舊

欠田賦及江西河南陝西去年被災州縣額賦

五月辛未湖廣總督張長庚奏忠建高羅木冊三土司繳印投誠

○癸酉山西巡撫楊熙奏請發常平倉穀賑恤孤貧從之○丙子

以孫廷銓爲內祕書院大學士由吏部尙書遷○廣西巡撫屈盡美奏慶

遠府土知縣莫宗詔土司鄧世廣韋盛春繳印投誠○丁丑以周

有德爲山東巡撫

由內宏文院學士遷

○甲申以巴格爲戶部右侍郎

原任侍郎

○兵部議准山東總督祖澤溥奏甯海州之黃島等二十島及蓬

萊縣之海洋島皆遠居海中遊氛未靖奸宄可虞請暫移其民於

內地酌量安插免其輸糧從之○乙酉以祖澤深爲湖廣右布政

使

由郎中遷

○戶部議准平西王吳三桂奏滇省初定請開鼓鑄從之

○丙戌戶部議准給事中吳國龍奏直隸各省解京各項錢糧自

順治元年起總歸戶部至七年復令各部寺分管催收以致款項

繁多易滋奸弊請自康熙三年爲始一應雜項俱稱地丁錢糧作

十分考成除每年正月扣撥兵餉外其餘通解戶部每省各造簡

明賦役冊送部查覈其易知由單頒給民間者盡除別項名色至

各部寺衙門應用錢糧年前具題數目次年於戶部支給仍於年

終覈報從之○丁亥湖廣提督董學禮奏提鎮各標將弁共招撫

西山餘黨洞寨一百四處繳到偽敕印一百六十餘件下部知之

○戊子以魏裔介爲吏部尙書

由左都御史遷

○敘剿平山東崑崙招虎

兩山賊寇功加總督祖澤溥兵部尙書○壬辰吏部議准甘肅巡

撫劉斗奏洮岷道缺奉裁歸併隴右道兼理查洮岷所屬州縣衛

所俱距鞏昌府八九百里深山窮谷奸宄易生應請仍留洮岷道

彈壓靖遠道所轄縣衛距府不遠事務無多應請裁併隴右道兼

理從之○甲午恭上 大行慈和皇太后尊諡曰 孝康慈和莊

懿恭惠崇天育聖皇后○乙未奉移 孝康皇后寶宮往 孝陵

上以 太皇太后再三諭止不克親送呼搶哀痛彌日不止○

是月免湖廣興國沔陽等八州縣衛浙江西安餘姚等五縣去年

被災額賦

六月壬寅葬 世祖章皇帝於 孝陵以 孝康皇后 端敬皇

后祔○戊申以龔鼎孳爲左都御史降補侍郎圖爾特爲兵部右侍郎

由左副都御史遷○己酉裁甘肅苑馬寺卿一主簿一監正七○王子以

尼滿爲刑部尙書由刑部左侍郎遷○乙卯兵部議覆平西王吳三桂奏

李定國之子李嗣興從邊外投誠繳偽冊寶印札帶領官弁兵丁

家口一千二百餘名象馬無算應照例議敘得旨李嗣興著授都

統品級以下各官從優再議○丁巳轉對喀納爲刑部左侍郎以

覺羅勒德洪爲刑部右侍郎由宗人府啓心郎遷○己未以李本晟管雲南

左布政使事廣東按察使○壬戌諭兵部提督張勇前鎮守甘肅地方

威名素著屬番讐服著以提督職銜調回甘肅鎮守其陝西提督

王一正所轄地方應與張勇作何分管爾部議奏○甲子以額赫

里爲左副都御史由通政使遷○是月免四川邛州名山黎州等八州

縣衛所去年被水額賦

秋七月己巳命給承恩公白文選世襲敕書如海澄公例○壬午

先是直隸各省市政使缺吏部將按察使與漢軍管參領阿達哈

哈番郎中等官較俸推升至是奉旨照品級考正推按察使○甲

申贈故浙江提督二等侯田雄太傅子祭葬諡毅勇○丙戌以席

式爲廣東按察使

原任雲南按察使

○壬辰予故內大臣二等伯伊爾登

祭葬諡忠直○癸巳戶部題請三庫各設郎中一員其各司分員

外郎筆帖式有不足者亦准添設從之○甲午予故南贛巡撫胡

文華祭葬○湖廣提督董學禮奏逆賊李來亨遁踞譚家寨大兵

四面圍守六月二十七日五鼓大霧賊乘勢突出分犯塘汛各鎮

標兵夾擊斬首七百六十五級生擒七十三名得旨事平察敘○

是月免陝西禮縣去年水災及貴州丹平司去年荒地逋賦

八月丙申朔以朱之瑤爲湖廣右布政使

由四川按察使遷

○辛丑左都

御史龔鼎孳奏錢糧新舊並徵參罰疊出那見徵以補帶徵因舊

欠而滋新欠請將康熙元年以前催徵不得錢糧槩行蠲免有司

既併心一事得以畢力見徵小民亦不苦紛紜得以專完正課下

部知之○癸卯轉董顯忠爲貴州左布政使

由雲南右布政使轉

○禮部遵

旨議覆鄉會考試停止八股文改用策論表判鄉會兩試頭場策

五篇二場用四書本經題作論各一篇表一篇判五道以甲辰科

爲始從之○乙巳復行滿洲蒙古漢軍繙譯鄉試○以趙開心爲

倉場侍郎加工部尙書銜

原任太僕寺少卿

○丙午陝西提督王一正奏

參將張自臣等會剿逆賊郝搖旗於白玉坪等地方招撫僞官賊

兵及家口二千餘人○己酉靖南王耿繼茂奏僞尙書參知軍政

事蔡雷鳴委曲開導海寇嚮化之路密令其子僞侍郎蔡協吉僞

通政蔡源等攜眷來歸真心效順應請敘錄下部議○庚戌福建

投誠僞同安伯鄭鳴駿奏報伊兄鄭泰集眾投誠爲姪鄭錦設計

羈留投綴自經遺命子鄭續緒統所部文武各官四百餘員水陸

兵丁七千三百餘名各帶家眷駕舟艦一百八十餘號直抵泉州

港口投誠並繳僞敕印等件 上深嘉之下部議敘○癸丑轉郎

廷相爲四川左布政使由河南右布政使轉郭一鶚爲廣東左布政使由陝西

布政使轉○以郭鳴鳳爲廣東右布政使原任福建右布政使李狃霄爲四川按

察使原任四川按察使○甲寅以流賊餘孽郝搖旗劉體純李來亨等竄

伏鄖襄山中猖獗梗化命都統穆里瑪爲靖西將軍都統圖海爲

定西將軍同都統輔國公宗室穆琛護軍統領孫達里都統覺羅

巴爾布護軍統領科爾昆統兵往剿○轉梁清寬爲吏部左侍郎

調郝惟訥爲吏部右侍郎由戶部調○增設江南湖廣陝西三省按察

使各一○乙卯浙江巡撫朱昌祚奏僞侯周崔芝乃鄭逆腹心其子周家政棄逆效順齎送僞印關防同其兄弟及僞鎮將領兵丁家口百姓男婦齊進温州黃華關隨就近安插下部知之○庚申授福建投誠僞同安伯鄭鳴駿爲遵義侯僞永成伯鄭纘緒爲慕恩伯○辛酉改鎮安土府爲鎮安府設通判一

九月辛未靖南王耿繼茂奏僞慶都伯王秀奇投誠○福建總督李率奏奏僞忠靖伯陳輝率文武僞官一百三十三員兵一千六百名家口八百餘名投誠得旨嘉獎下部議敘○廣東總督盧崇峻奏廣東香山等縣如黃梁都三竈諸處皆在海島爲盜賊淵藪駕艇剽掠遣發官兵令廣州總兵官張國勛總統分布按剿共擒斬逆賊趙劈石等二千三百餘名邊界頓清張國勛躬親調度諸府分猷效力下部察敘又奏粵東賊首李宗翰攻劫長樂永安興

甯等縣界臣會同提督楊遇明遣官討平下部察敘○乙亥轉朱

之弼爲戶部左侍郎以艾元徵爲戶部右侍郎由內國史院學士遷○己卯

甘肅巡撫劉斗奏靖遠道已裁併隴右道兼理請將臨鞏道改爲

臨洮道專轄臨洮府狄河蘭金渭五州縣洮岷道專轄階文成漳

四州縣洮岷二衛西固一所至隴右道專管隴甯伏秦清醴西徽

兩安會通秦十三州縣靖遠一衛各道既不管軍職銜內兵備二

字應刪部議如所請從之○辛巳以李嵩陽爲廣東按察使由陝西甯

夏道○丁亥以田起蛟爲陝西右布政使由郎中遷○戊子予故原任

倉場侍郎陳協祭葬○己丑管理福建安輯投誠事務郎中賁岱

奏僞統領挂甯南將軍印左都督陳舜穆率轄下總兵二員副總

兵六員參將二十員遊擊十九員都司三員守備一員兵部主事

一員工部郎中一員監紀推官二員兵丁一千名投誠○庚寅予

故致仕陝西四川總督金礪祭葬○甲午兵部左侍郎熊文舉以病乞假允之○是月免直隸霸州武清雄縣等十四州縣水江南鳳淮揚府屬十五州縣衛江西玉山等十二縣旱陝西莊浪甯州雹災賦有差

冬十月丁酉福建總督李率奏奏偽副統領何義乃鄭錦所倚得力之人今同偽總兵魏明等率眾來歸請從優錄敘以示鼓勵下部知之○己亥以王度爲倉場侍郎

由大理寺卿遷

○庚子四川總督李

國英奏巨寇劉二虎李來亨郝搖旗袁宗第党守素塔天寶馬騰雲七家出犯巫山水陸諸將勦力戰守得全危城乞迅發大兵乘勝剿滅下部知之○壬寅福建總督李率奏奏延建等處皆高山峻嶺賊首王鐵佛等倚險結巢建甯延平邵武將弁統兵剋期夾剿三路齊進奮勇力戰殺賊一百一十七人生擒王鐵佛等六十

八人正法又奏海逆鄭錦遣僞副將林維等率舟師由海門欲乘風直入海澄燒新造戰船提臣施琅密遣守備王明等統水師夜半直抵海門賊鯨前來拒敵我兵奮勇陣殺僞副將林維等生擒賊將兵丁共一百二十五名奪獲船隻器械得旨嘉獎下部察敘

○癸卯平西王吳三桂奏隴納妖人阿仲叛逆得旨阿仲僭稱僞號聚眾狂逞屢經平西王奏報雖係貴州作亂起於廣西廣西將軍總督提督將此大事若爲弗知屢經鄰省奏聞猶隱匿不報著明白回奏○丙午以吳嵩印爲河南右布政使

出湖廣按察使遷

○壬子

以曹國柄爲兵部右侍郎

由左副都御史遷

○甲子子故致仕大學士胡

士安祭葬○禮部議覆陝西總督白如梅奏當哈爾佛僧進貢查會典並無當哈爾佛僧進貢之例但傾心嚮化應准其進貢從之

○是月免直隸慶雲浙江江山等十四縣湖廣衡陽等三縣被災

額賦有差賤入旗被水屯地米二百餘萬

十一月乙丑朔戶部遵旨議覆凡外國進貢之人帶來貿易物件應令崇文門監督止記冊報部不必收稅從之○刑部議覆山東總督祖澤溥審鞫原任按察使宋琬等通同于七謀反一案兩議上請一擬極典一擬流徙將原審總督祖澤溥議處得旨據審宋琬等原無通賊情節干證唐進夏吳八等亦堅稱烏有叛逆重罪理應詳審情實卽應正法如虛卽應免罪爾等將無確據之事懸揣定擬兩議均屬不合宋琬等著免罪總督祖澤溥亦免議處○丁卯以董篤行爲左副都御史由宗人府府丞遷○福建總督李率奏海寇五百餘人由梁山侵犯海疆總兵官王進功參將折光秋夾擊大敗之殺賊一百六十餘人生擒九人下部察敘○戊辰靖南王耿繼茂奏僞平國公鄭芝龍子鄭世襲素蓄歸順之心緣鄭成

功攜往臺灣及鄭成功暴亡復被逆孽鄭經帶回廈門脫身無術至是乘間率僞文武官二百二十四員水陸兵一百二十名家口船隻盔甲器械等物投誠又僞都督鄭廣係同安伯鄭鳴駿之弟攜帶官兵共三百一十五員名家屬共三百四十二名口投誠下部議敘○庚午御史張志尹奏百爾臣工品秩不同宣力則一必遷轉無礙立法均平庶無壅滯之虞近見銓政如升補方面一項守巡二道經年有補無升致俸滿各官一槩停滯請敕部確議凡遇方面缺出俱照大小各官雙月推升單月急選之例使升者與補者兩不相礙庶銓法畫一永久無弊下部議○乙亥靖南王耿繼茂奏僞左都督楊富純率僞都督僉事陳宗等文武官二百三員兵丁三千二百二十五名並戰艦盔甲器械等物投誠下部議敘○浙江總督趙廷臣奏僞靖波將軍侯阮美率弁兵家口共三

千六十六員名投誠下部議敘○己卯轉王鏌爲江南左布政使

由江西右布政使轉

以石琳爲江南按察使

原任山東按察使

陳丹陛爲湖廣按察

使

由貴州貴甯道遷

○庚寅陝西西甯臨鞏總兵官柏永馥進黃鸚鵡卻

之○是月免直隸南皮等六州縣江南太和等三縣四川建昌等

衛被災額賦有差

十二月甲午朔靖南王耿繼茂福建總督李率泰等奏十月二十

一日臣等統率大軍渡海攻克廈門賊眾驚潰登舟水師提督施

琅會荷蘭國夾板船邀擊之斬首千餘級乘勝取浯嶼金門二島

逆賊鄭錦周全斌等勢窮背遁得旨據奏官兵進剿海逆克取廈

門金門焚毀賊巢具見王等調度有方將士用命克奏膚功深可

嘉尙荷蘭國出海王率領舟師協力擊賊亦屬可嘉在事有功人

員俱著察明議敘○乙未以法若真爲湖廣右布政使

由浙江按察使遷

○丙申靖南王耿繼茂等奏十月二十八日逆賊鄭錦等遣兵五

千人突犯雲霄右路總兵官王進功率官兵逆擊之斬殺過半餘

眾盡赴水死請將官兵分別賞賚以示鼓勵得旨嘉獎下部察敘

○庚子授四川投誠僞富平伯賀道甯左都督銜○甲辰以劉格

為四川巡撫山順天府尹遷○己酉平南王尚可喜奏官兵進剿蠻賊

擒僞恢粵將軍周玉僞軍師林輔邦及賊兵二百七十六名斬首

二千六百三十七級焚賊船一百三十一隻下部察敘○乙卯以

郎永清為湖廣右布政使山山東按察使遷陳宏業為江西右布政使山

西按察使遷馮瑾為浙江按察使山甯紹道遷○丙辰吏部議准遼東將軍

吳庫立奏請添設盛京刑部郎中二員外郎六得旨如議仍添設

侍郎一員爾部將應補官員開列具奏○己未禮部奏定南武壯

王孔有德之女孔四貞呈稱伊父孔有德於順治九年在廣西殉

難奉 世祖章皇帝諭旨建祠致祭請於祠前立碑以表忠節查

孔有德祠工部見在建造告竣後每歲春秋遣太常寺官致祭至
所請立碑之處孔有德墳所已經立碑不便另立得旨仍與立碑

○辛酉以屈盡美爲廣西總督

由廣西巡撫遷

○刑部以歲終彙報病故

監犯得旨據奏監犯病故者甚多人命關繫重大罪不至死者久
淹獄中管獄官役不與犯人飲食餓斃亦未可知獄官獄卒如此
疏忽殊爲不合著嚴加申飭○是月免湖廣安鄉等十四縣衛雲
南昆明等七縣衛江西鄱陽等四縣浙江桐鄉縣貴州都勻等七
衛所被災額賦有差○是歲朝鮮來貢○人丁戶口一千九百二
十八萬四千三百七十八田地山蕩畦地五百三十四萬九千六
百七十五頃一十畝徵銀二千五百七十九萬八千三百六十五
兩有奇米豆麥六百一十四萬二千三百三十八石有奇草二百

二十七萬二千三百五十二束茶十五萬七千九百五十五引行
鹽四百三十萬一千八百四十引徵課銀二百七十四萬二千三
百五十二兩有奇鑄錢二萬九千五百七十三萬五千三百六十
有奇

東華錄

康熙四

臣王先謙敬編

臣周潤蕃恭校

康熙三年甲辰春正月庚午增四川夔州知府○湖廣總督張長庚奏僞部院毛壽登始爲僞永厯朱由榔所倚恃繼爲眾逆寇所推重今革面來歸請敕優敘下部議○辛未四川總督李國英奏巨寇郝搖旗下僞總兵馬進玉等率眾投誠下部察敘○甲戌以金光祖爲廣西巡撫由左布政使遷○新設盛京刑部侍郎以內國史院學士通格爲之○江西總督張朝璘奏南昌府屬浮糧係陳友諒橫行徵派明季相沿今蒙恩恤照袁瑞二府一例減免其漕米一項奉部文覆行查覈臣按漕米浮多亦明季踵行弊政並無虛假請槩行減免下部知之○丙子管理福建安輯投誠事務戶部

郎中賁岱奏鄭芝豹生母黃氏率子姪眷屬等赴閩投誠下部察
敘○戊寅禮部題安南國所貢方物與會典不符嗣後入貢請令
遵照會典得旨外國慕化入貢所進之物著卽收納不必遵照會
典○庚辰命各省學道缺出將進士舉人出身者一併開列增入
品級考○以李本晟爲河南右布政使由雲南按察使遷宋可發爲山西
按察使由湖廣驛鹽道遷王廷諫爲山東按察使由湖廣荆西道遷○甲申四川
總督李國英等奏蜀中巨寇劉二虎郝搖旗袁宗第抗撫負固蒙
遣西安將軍傅喀禪副都統杜敏統領大兵會同督提進剿於康
熙二年十二月二十三日師次陳家坡偪近賊巢滿漢兵奮勇剿
殺賊遁入天池寨杜敏等統兵追剿劉二虎勢窮自縊郝搖旗袁
宗第夜遁杜敏等復追至黃草坪大敗賊眾擒郝搖旗袁宗第並
僞王朱宗漢等數萬巨寇一朝埽平無一漏網得旨嘉獎下部察

敘○丙戌福建總督李率奏原任提督侯馬得功妻劉氏子馬三奇等呈稱馬得功統領水陸官兵攻取廈門金門二島力戰身死請賜恩卹以慰忠魂得旨馬得功捨身死戰墮水殞生著從優議卹○丁亥陝西定遠衛爲靖遠縣裁同知守備千總經歷設知縣典史○予故致仕廣東總督李棲鳳祭葬○己丑予故倉場侍郎趙開心祭葬○授福建投誠僞伯陳輝爲慕仁伯○平西王吳三桂奏進剿廣西隴納山寇生擒妖人阿仲逆寨悉平得旨嘉獎下部察敘○靖南王耿繼茂奏臣生長邊陲幼嫻武備前蒙太宗世祖恩加世襲今年雖未邁疾病相仍臣子耿精忠侍從有年未諳軍旅懇賜遣歸俾臣力疾教訓以備驅策上以其情辭懇切允之○癸巳裁會試中式副榜

二月癸卯靖南王耿繼茂等奏福甯總兵官吳萬福招撫僞鎮林

國樑投誠隨遣遊擊李應先等協同攻克長腰東蚶二島寇巢破滅僞兵部阮春雷逆渠張煌言僅以身免請敕議敘得旨據奏逆賊阮春雷張煌言等竊踞東蚶長腰等島合夥狂逞官兵奮勇夾剿擒斬賊將奪獲船隻焚毀賊巢深可嘉尙在事有功人員著察明議敘其僞鎮林國樑帶領家口傾心投誠復奮勇自效同官兵搗賊巢穴克奏捷功非尋常投誠可比著從優議敘○乙巳命吳三桂斬阿仲於軍前○丁未兵部議准平南王尙可喜奏銅山諸逆鄭錦周全斌等各思歸誠請以招撫事宜專責饒平總兵官吳六奇相機料理從之○戊申管理廣東安輯投誠事務刑部郎中花善等奏僞都督杜輝於康熙二年十一月率所屬將領一百二員水陸兵丁二千九十六名大小戰船六十二隻繳僞印關防牌札獻南澳地又僞總兵吳陞率所轄僞官三十三員兵六百九十

三名大小船十三隻繳偽觀武將軍印投誠下部知之○己酉轉

李迎春爲廣西左布政使

由右布政使轉

○癸丑增甘肅按察使員缺統

轄平慶臨鞏四府駐鞏昌府○丁巳予故致仕吏部侍郎胡兆龍

祭葬○命山東驛鹽道事務歸併濟南守道兼理○己未湖廣總

督張長庚奏西山巨逆馬騰雲党守素塔天寶等率眾歸誠下部

知之○庚申禁督撫等衙門私設賞功將材傳宣聽用等材官○

是月免江南壽州等五州縣衛湖廣嘉魚澧州等二十二州縣去

年被災額賦有差免陝西秦州元年被水額賦十之三

三月丙寅靖南王耿繼茂奏海逆洪旭黃廷等擁鄭錦殘黨遁踞

銅山所轄僞將張燦吳盛等率領兵民渡海投誠羣賊分踪來追

意欲乘機入犯內地總兵官王進功統兵馳勦殲賊眾於陸鰲破

賊巢於下蔡斬首千餘級接應投誠人等入界在事有功鎮將及

張傑等均請敘錄下部察敘○壬申平西王吳三桂奏進剿隴納已捷惟狡逆賀雲潛逃二年十二月發兵搜剿全無蹤影因上下木咱地方離此不遠蠻目陸亮等係賀雲至親平日連結甚於別寨恐賀逆逃匿彼中隨令總兵官王會趙良棟張鵬程等分三路進剿逆苗礮弩交發我兵奮力衝殺陣斬陸亮擒殺逆蠻一千三百八十名賀雲聞敗自刎家口悉擒下部覈議○甲戌以湖廣武昌漢陽黃州安陸德州荊州襄陽鄖陽八府歸湖廣巡撫轄長沙衡州永州寶慶辰州常德岳州七府郴靖二州歸偏沅巡撫轄○增湖廣按察使員缺駐長沙府○乙亥以陳子達爲陝西按察使由四川威茂道遷潘超先爲甘肅按察使由直隸口北道遷○吏部奏前奉 上諭凡官員較俸推升衙門相同卽與同品官較俸但衙門品級各有大小不便一體較俸應另行定議今議大學士缺以各部尙書

左都御史推補如不用以各部侍郎學士推補各部尙書缺照衙門次序以尙書左都御史轉補如不用以各部侍郎推補吏部侍郎缺以各部侍郎轉補各部侍郎缺以學士左副都御史通政使大理寺卿宗人府府丞推補如不用以府尹太常寺卿推補左副都御史缺以通政使大理寺卿宗人府府丞推補如不用以府尹太常寺卿推補如不用以光祿寺卿推補如不用以左通政推補通政使大理寺卿缺以府尹太常寺卿推補如不用以光祿寺卿推補如不用以侍讀學士左右通政大理寺少卿照考語俸次推補府尹太常寺卿缺以光祿寺卿推補如不用以左右通政大理寺少卿推補如不用以太常寺少卿鴻臚寺卿太僕寺少卿督捕理事官照考語俸次推補光祿寺卿缺以左右通政大理寺少卿推補如不用以太常寺少卿太僕寺少卿鴻臚寺卿督捕理事官

照考語俸次推補其小四品京堂缺將每年內升京官四員用完
後用五品京堂一缺再用內升司道一員得旨學士既推侍郎以
後大學士缺停其推用餘依議○丁丑以彭而述爲廣西右布政
使由貴州按察使遷○癸未予故理藩院侍郎席達禮祭葬諡僖敬○予
故原任浙江巡撫史國珍祭葬○丙戌賜嚴我斯等一百九十九
人進士及第出身有差○是月免湖北黃岡等十三縣衛去年水
災額賦有差

夏四月癸巳朔命湖廣右布政使移駐長沙轄長寶衡永辰常岳
等七府郴靖二州○甲午管理福建安輯投誠事務郎中賁岱奏
僞左都督陳陞率大小文武官一百二十三員兵丁二千六百餘
人渡海投誠○已亥輔政大臣鰲拜等與內大臣飛揚古有隙及
飛揚古子侍衛倭赫與侍衛西住折克圖覺羅塞爾弼四人同值

御前不敬輔臣輔臣惡之遂以勸幸景山瀛臺擅騎 上所乘

馬用 上弓矢射鹿論斬又以飛揚古守 陵怨望並其子尼侃

已出征之薩哈連俱坐絞惟色黑以不知情免死後仍發甯古塔
房產籍入鰲拜之弟穆里瑪家其折克圖之父鄂莫克圖西住之
兄圖爾喀塞爾弼之同祖兄塔達等俱以明知子弟所犯重大不
卽請旨治罪分別革職鞭責○福建總督李率奏奏僞左鎮林國
樸率眾投誠得旨嘉獎下部察敘○癸卯吏部議覆奉天府府尹
徐繼煒奏盛京爲發祥重地請升遼陽爲京縣與宛大一例查遼
陽不與奉天同城且外縣京縣品級不同不便改爲京縣得旨奉
天府內著設一縣山海關以外開原以內應添設府州縣兩部酌
議以聞○丙午諭祭安南國王黎維祺以內祕書院編修吳光爲
正使禮部司務朱志遠爲副使○戊申裁鄖陽撫治○癸丑兵部

議敘僞忠明伯周全斌率左右都督以下楊泮等投誠功得旨周全斌授爲三等伯楊泮周珍曾傳黃寶林英授左都督職銜張隆阮星歐瑞陳麟賴工張岳授右都督職銜○是月免湖廣興國等三州縣去年被水額賦免陝西禮縣元年水災額賦十之三

五月甲子詔州縣私派而上司容隱者並坐其罪○丙寅靖南王耿繼茂等奏三月初六日臣與總督李率泰提督王進功海澄公黃梧等領兵先後至八尺門僞威遠將軍翁求多率兵民六萬餘人納款十四日夜半渡海進拔銅山焚毀賊巢斬首三千二百餘級僞永安侯黃廷僞都督余寬等率僞官兵家屬人等三萬二千四百餘名出降所獲船隻盔甲器械無算逆渠鄭錦僅存數十艘乘風遁走臺灣計閩海地界凡數十島賊巢布列至是掃滅殆盡得旨嘉獎下部察敘○丁卯命江甯蘇松常鎮徽甯池太九府廣

德一州分隸江南按察使司仍駐江甯府安慶廬鳳淮陽五府徐
滁和三州分隸江北按察使司駐鳳陽府之泗州○己卯命廣西
總督自梧州移駐省城○壬午予故致仕江南總督馬國柱祭葬
○吏部都察院議覆御史張冲翼奏向來卓異薦舉皆有定額今
考滿官員大省應定一等若干名二等若干名中省小省一等二
等若干名仍必實指某人以何政績無愧一等某人以何政績無
愧二等如定額之外濫冒一人及優考之人別經發覺將督撫一
併議罪卽在內各部院亦當以員數之多寡定一二等之多少庶
令內外大小臣工爭自濯磨當考滿之際咸知自審才分永息奔
競之風應如所請再行部院直隸各省嚴加考覈得旨近日內外
文武各官考滿一等二等甚多豈無一才力不及不稱職者此後
各部院直隸各省文武官員考滿將三年之內某官所辦某事奉

旨改正者某事駁行者某事處分者某事察明保奏若考過一等二等官員非係賢能及不稱職事發之日將考覈時具保之官一併治罪餘如議行○癸未授福建投誠周全斌爲承恩伯食三等伯俸○甲申禁直省繫囚毋用非刑苛虐○是月免湖北石首縣去年被水額賦十之三

六月甲午增奉天府府丞治中通判推官設承德開原鐵嶺三縣改遼陽縣爲州並海城蓋平屬奉天府改廣甯爲府增通判推官經歷設廣甯縣甯遠州並錦縣屬廣甯府俱令奉天府府尹轄○命河南驛傳道移駐襄城○以巴泰爲內國史院大學士

由內大臣遷

○丁酉福建總督李率泰以病求罷得旨覽奏患病是實本當卽允所請但閩省投誠兵民官員最爲繁眾著親行安插務使得所事竣之日解任回京應作何加級加恩該部一併議奏○戊戌禁

民間私市馬匹○己亥以佟國楨爲江南按察使

由江南淮海道遷

王廷

弼爲江西按察使

由廣東嶺南道遷

李榮宗爲湖廣按察使

由陝西河

○

己酉以朱昌祚爲福建總督

由浙江巡撫遷

○庚戌授福建投誠僞侯黃

廷爲慕義伯○廣西巡撫金光祖奏左江守巡二道所轄者潯南

太三府並思明上府與南甯太平所屬二十八土司自巡道裁撤

歸併守道非一官所能兼攝查桂林巡道事務甚簡應改爲左江

巡道仍駐紮南甯左江守道仍駐潯州將桂林巡道事併桂平守

道兼管從之○癸丑增廣東水師提督一左右兩路總兵官二○

丙辰以蔣國柱爲浙江巡撫

原任山東巡撫

○庚申諭戶部等衙門各項

錢糧關繫國計民生必徵輸起解歷年清楚然後國用有裨軍需

不匱小民無催科之擾官員免參罰之累向因直隸各省自順治

元年至十七年拖欠銀共二千七百萬兩有奇米七百萬石有奇

藥材十九萬斤有奇紬絹布匹等項九萬有奇先曾有旨應作何催徵作何蠲免著議政王貝勒大臣九卿科道會議具奏今據奏將河南湖廣等省所欠錢糧內有議蠲免者有仍催徵者此累年積欠錢糧豈盡屬小民之故歟前者假託催徵貪官污吏科派小民侵吞入己者甚多此皆貪污官吏侵剋那移撮借運糧官侵漁解糧官役自用盜賊搶奪火燒水溺等項拖欠至此而追徵之時有將人繫獄者亦有實欠在民雖遇恩詔未得盡蠲免者今將此項嚴催小民無故派徵見任官空受處分且以此拖欠錢糧撥給兵丁兵餉缺額無益況不肖官役嚴加追比反借端多派小民朕甚憫之今將自順治元年以来十五年以前所欠銀米藥材紬絹布匹等項錢糧悉予蠲免其先經議處官員人等不議外見在催徵監禁追比各犯之罪俱著寬釋以後貪官奸吏若將奉旨蠲免

款項復借端苛擾派徵加等從重治罪至直隸各省兵丁征勦守禦效力備極勞苦惟需糧餉以資生計向因新舊兼徵錢糧不完以致兵餉亦多壓欠十五年以前所欠兵餉理應找給但民欠錢糧俱經蠲免不必復給自順治十六年以來所欠兵餉俱著找給以後務按期支給俾兵丁無內顧之憂乃副朕軍民一視同仁至意如仍前將應給兵餉不實給發及違禁侵剋那用等弊從重治罪爾等通行曉諭俾咸知朕意○是月免江西餘干安仁二縣去年被水額賦

閏六月辛酉朔以福建興化泉州漳州三郡旱災命督撫加意賑恤○壬戌加致仕福建總督李率泰爲正一品○福建總督李率泰奏總兵官李長榮等出洋會剿逆寇張煌言擊敗賊眾五千餘人擒僞總兵張賢等並獲船隻器械下部察敘○癸亥頒賜荷蘭

國王段匹銀兩以二年冬助剿海逆有功也○加甘肅提督張勇
太子太保○浙江總督趙廷臣奏僞將軍鄭殷就撫○丁卯平西
王吳三桂奏水西逆苗安坤等梗化臣親提師至畢節由大方烏
西直搗臥這遣總兵沈應時副都統高得捷都統吳國貴參領李
良棟總兵劉之復等由臥這果勇騰勝大方等處分路進剿自二
月至五月斬獲無算又貴州提督李本深總兵王友進等攻賊於
塔寨箐又自雪棚攻破阿哈箐又總兵李如碧塔新策等進攻米
歹河直抵折落河又滇黔三路總兵王會趙良棟等會同廣西各
將合兵攻剿龍廣補崗等處李本深擊賊於六廣河都統吳國貴
總兵王輔臣等大敗賊眾於矣列追至天生橋安坤安如鼎僅以
身免得旨嘉獎下部議敘○辛未命偏沅巡撫自沅州移駐長沙
○乙亥刑部尙書高景以考滿不稱職解任○己卯裁江南隨征

左右二路總兵官○裁浙江隨征總兵官○乙酉以王宏祚爲刑

部尚書

原任戶部尚書

○丙戌以漢軍京堂官歸入漢缺與漢人一體升

授並諭堂官員缺漢軍官員每衙門不得過一員

秋七月庚寅朔以彭而述爲雲南右布政使管左布政使事

廣西布

政使

○以張彥珩爲貴州按察使

由貴州糧道遷

○甲午管理福建安輯投

誠事務戶部郎中賁岱奏自康熙元年至三年止合計投誠文武

官三千九百八十五員食糧兵四萬九百六十二名歸農官弁兵

民六萬四千二百三十名口眷屬人役六萬三千餘名口大小船

九百餘隻下部知之○戊戌裁四川上南巡道缺歸併上南守道

兼理令春夏駐嘉定秋冬駐邛州○己亥禁外國饒遺邊藩督撫

○庚子廣西總督屈盡美奏下井猺賊負固作亂督兵進剿斬獲

無算○癸卯以考滿加四川總督李國英太子少保○甲辰吏部

遵旨議覆總督巡撫如因功加級兼僉都御史銜者加一級授爲從三品加二級授爲右副都御史兼副都御史銜者加一級授爲右侍郎仍兼右副都御史舊例右侍郎加一級授爲左侍郎左侍郎亦係正三品不爲加級嗣後右侍郎加一級轉爲左侍郎仍加一級授爲從二品如再加一級授爲尙書仍兼右副都御史兼尙書銜者加一級授爲從一品加二級授爲正一品又舊例加級至一品後遇應加一級改爲紀錄二次嗣後不必改加級爲紀錄如有加級紀錄款項將緣由註冊仍照定例抵銷處分得旨所議定例止及總督巡撫其在外司道以下各官並在內大小官員加銜加級之例俱應確議又向來各官升轉時有不論品級正從者降削時方論正從亦屬未合著一併確議定例以聞○丁未以福建水師提督施琅爲靖海將軍承恩伯周全斌太子少師左都督

富副之征勦臺灣○戊申定科場內外簾處分例○庚戌轉吳達

禮爲吏部左侍郎以羅敏爲吏部右侍郎

由內宏文院學士遷

○廣東總督

盧崇峻奏新安縣瀝源地方積賊袁瑞等盤踞劫掠提標遊擊梁有才等勦平之○丙辰予故致仕南贛巡撫蘇宏祖祭葬○戊午四川總督李國英奏官兵恢復大昌下部察敘○是月免貴州新添衛去年被水額賦

八月辛酉予故原任內弘文院大學士呂宮原任湖廣總督李蔭祖祭葬○吏部遵旨議覆開復等官應否給還紀錄薦舉之處查降革官員凡係因公註誤後經辨明開復者是本官原無降革之罪故將原有紀薦仍應給還至於拖欠錢糧被參各官於未離任之先續徵完解雖據該撫題明開復但係催徵不力之員任內先有紀薦應不准給還永著爲例從之○丁卯以王原撫爲廣西右

布政使

由福建按察使遷

秦弑爲江西按察使

由陝西東路道遷

趙日冕爲江南

按察使

由廣西桂平道遷

○戊辰浙江總督趙廷臣奏僞兵部侍郎蔡昌

登等投誠○甲戌浙江總督趙廷臣奏逆渠張煌言盤踞浙海多

年其下僞官節次招降獨張煌言抗不就撫臣與京口將軍劉之

源先後發書遣使諭以禍福勸其去逆效順張煌言至死不悔雖

將隨從兵弁船隻起發進關猶借名歸隱徜徉海外臣卽馳赴定

海會商水陸提督哈爾庫張杰分遣將士配坐船隻由甯台溫三

路出洋按剿毀其賊巢殲其餘黨偵知張煌言披緇遠遁密令驍

勇將備徐元張公午扮成僧民隨帶健丁火器潛伏普陀山一帶

仍撥將弁扼守要路以防奔竄至七月二十日瞭望朱家尖有趕

繒船一隻急舉火器前擊獲有活口林生陳滿等知張煌言見在

懸山范鼻徐元等卽駕所獲賊艘尾隨八槳兵船令活口林生等

仍紛差回原船使之不疑乘夜進一小港從山後覓路突入帳房
遂擒張煌言及其親信餘黨搜出偽視師兵部銀方印一顆偽關
防九顆槍礮盔甲旗繖等物三省之出沒渠逆一旦生擒凡經過
甯紹杭各府百姓聚觀如堵從此奸宄絕蹟海宇肅清得旨嘉獎
下部議敘○己卯湖廣總督張長庚奏靖西將軍都統穆里瑪定
西將軍都統圖海等率禁旅與三省綠旗兵合剿西山巨逆郝搖
旗劉汝魁等業經授首獨李來亨擁眾茅麓山最爲險峻官兵晝
夜環攻賊勢窮迫其黨陸續下寨歸降八月初五日李來亨全家
自縊舉火焚巢官兵按剿餘黨楚寇蕩平全師奏凱下部議敘○
辛巳 孝陵工成○是月免直隸霸州等四州縣被水額賦

九月甲辰免浙江衢州府屬荒地糧仍招民開墾○丙午廣東總
督盧崇峻奏平南王將軍提督等統領官兵於八月十二日進剿

碣石衛賊巢擒斬賊首蘇利俘獲餘黨萬餘賊寨蕩平得旨嘉獎下部察敘○癸丑福建總督李率奏官兵會剿茶仔畚山寇生擒賊首余角餘黨俘斬無算各峒寨悉平下部察敘○乙卯廣西總督屈盡美奏剿平恭城縣徭賊擒逆酋黃天貴斬獲餘黨無算其附近唐王等徭寨相率歸降下部察敘○是月免直隸樂亭等八縣山東章邱等三縣水災額賦

冬十月己未朔命武職三品官用豹補四品官用虎補○吏部議奏漢軍監察御史缺出以通政司知事等官補授其御史升缺則爲左右通政大理寺少卿等官是以六品七品之人補授御史而所升之缺品級太優今後漢軍御史缺出請以正五品郎中補授如無五品郎中以正五品員外郎補授從之○彗星見○庚申吏部遵奏滿漢官員畫一相對今漢軍漢官旣一體升轉各衙門有

漢軍漢官兩員者應裁去一員得旨漢軍侍郎學士以上一衙門

不得過一員其餘各官俱著照舊倉場事務繁多漢軍漢人侍郎

各一仍舊存留○甲子轉張殿爲廣東左布政使由福建右布政使轉以張

宏俊爲福建按察使由山東東兗道遷○丙寅靖南王耿繼茂奏荷蘭國

出海王於八月十六日帶領番船十隻番兵千人抵閩安鎮約九

月二十至圍頭取齊於十月初旬往澎湖攻賊巢候風便進取臺

灣下部知之○戊辰海逆張煌言伏誅○癸酉賜吳三畏等一百

人武進士及第出身有差○是月免江南宿州等九州縣衛陝西

西甯衛水災額賦

十一月甲午內祕書院大學士孫廷銓以疾乞假允之○壬寅以

孫代爲福建右布政使原任江甯右布政使○丙午湖廣提督董學禮奏僞

國公王光興遣伊親子王世德同僞巡撫蔣尙膺齎繳敕印投誠

○丁未以魏裔介爲祕書院大學士調杜立德爲吏部尙書王宏

祚爲戶部尙書

由刑部調

○賜定南武壯王孔有德女四貞銀三千兩

粧蟒色段四十匹○壬子賜故福建提督三等侯馬得功墓地○

癸丑以龔鼎孳爲刑部尙書

由左都御史遷

○是月免江南泗州湖廣沔

陽浙江西安陝西河州等四十八州縣水災額賦

十二月戊午朔日有食之○庚申四川水師總兵官向化侯譚詣

請辭侯爵得旨譚詣獻地抒誠著有勞績著仍以侯爵盡心供職

不必固辭○壬戌以陳秉直爲河南按察使

由山西河東道遷

李月桂爲

廣西按察使

由陝西關西道遷

○癸亥以葉成額爲工部尙書○原任禮

部尙書王崇簡以老疾乞休命原官致仕○己巳山東巡撫周有

德奏山東爲南北孔道十省通津當倡議分路之時止從陸路起

見故河南議分湖廣廣西陝西四川雲南貴州等六省山東議分

江南浙江福建江西廣東等五省論分省之多寡似得其平合水陸繁簡情形計之則山東所分之五省其王公將軍督撫提鎮等衙門較多於他省加以運河直貫其中兵差解運船隻悉由此路往來沿河居民盡爲緯夫其或不足取之地方州縣經費有限民力幾何而況楚蜀雲貴廣西等省之船路所必經是名爲五省而實爲十省其繁苦不幾三倍於河南耶請將陸路所分之江西廣東二省敕令取道河南庶民困可以少甦而驛站無倒塌之憂矣下部議○甲戌金星生白氣長三丈餘○乙亥調雷虎爲戶部左侍郎以杭艾爲工部右侍郎由通政使遷○壬午改奉天所屬錦縣爲錦州府廣甯府爲廣甯縣屬錦州府○兵部督捕左侍郎馬希納等奏臣衙門之設專以緝獲逃人禁止奸頑近有奸民結黨夥告恣行嚇詐及至提審多屬子虛此輩原非實報逃人止欲藉端嚇

詐故首告狀內不詳寫被告人居址姓名滿其欲則藉爲開脫之
端不應其求則改爲嫁禍之地雖將原告治罪而被告人家產蕩
然有死於路斃於獄者乞敕部嗣後首告之人帶逃人之主同赴
具告者准咨該督撫嚴查解部若並無逃人取地方官保結咨報
免提案內牽連之人質審得旨不將被告干證提來質審則逃人
獲者稀少若提來質審不但牽連多人且往來提解甚苦以後有
首告逃人在某處某家者將首告之人擊送地方官照發去口供
止將窩隱之人令出質問若無逃人而挾讐控告或牽引妄扳將
誣告之人加等治罪○是月免湖南耒陽福建閩縣等十二州縣
水災額賦○是歲朝鮮琉球來貢○人丁戶口一千九百三十萬
一千六百二十四田地山蕩畦地五百三十五萬八千五百九十
三頃三十五畝徵銀二千五百八十萬七千六百二十九兩有奇

米豆麥六百一十四萬四千八百五十七石有奇草二百二十九萬一千一百三十二束茶十五萬八千五十三引行鹽四百三十五萬八千一百二十三引徵課銀二百七十四萬三千六百七十五兩有奇鑄錢二萬九千五百九十萬九千五百有奇

東華錄

康熙五

臣王先謙敬編

臣周倫蕃恭校

康熙四年乙巳春正月壬辰以郝惟訥爲左都御史

由吏部左侍郎遷

○

甲午諭兵部督捕衙門向因滿洲藉家僕資生若立法不嚴必致

盡行逃走不得已嚴定窩逃之法非欲以逃人之故貽害於民也

今聞各地方奸棍結黨詐害報讐或指逃報部提審全虛或指稱

某家窩逃審虛復扳別家或逃檔無名復改易名姓或自稱逃人

解部無人識認或棍徒在地方犯罪逃京投旗希圖免罪或地方

官拏獲重犯因誑稱逃人不敢加刑遷延漏網或解役與逃人結

黨沿途搶掠肆行無忌或地方官唆令逃人指扳富室巧行嚇詐

此等株連蔓引冤及無辜餓死道途瘐斃監獄實屬可憫何以立

東華錄

康熙五

十

法使逃人可獲奸棍不得肆惡小民不受詐害著議政王貝勒大臣九卿科道確議具奏○丁酉御史季振宜奏停止考滿三疏一言自行考滿以來臣見部院大臣上疏自陳不過鋪張履歷功績博朝廷表裏羊酒之賜至各堂官考覈司屬朝夕同事孰肯破情面秉至公其中鑽營奔競弊不勝言況今自尙書以下悉按品升補與考滿全無關涉且自正月至四月皆自陳考滿之日一人一疏以數千計加之六部覆奏殷繁諸務叢脞弊從此生請停考滿之法申飭羣工循名責實安心辦事止照俸序升轉庶息躁進之風一言外官考滿改入法科條以五等爲優劣數年以來其弊尤甚卽如州縣官由府廳至督撫經五六衙門考覈各上司豈盡不受賄賂不徇情面一憑公道品騰優劣者乎若層層較覈州縣力不能堪勢必侵欺國帑刻剝小民以賄屬上官希圖越俸升轉相

習成風莫可挽回請嗣後直隸各省不肖官員止責督撫不時糾劾其任內無參罰註誤者吏部照俸升轉一言武職考滿副將以下莫不營謀優等武官無錢糧可以侵那勢必扣剋窮兵糧餉設有意外賊盜綠旗窮兵精力消於飢寒器械罄於典鬻貽誤封疆不無隱憂請嗣後凡歷俸深功次多者兵部按籍升轉其生事擾民不修營伍侵蝕兵餉者令督提不時糾參得旨考滿之典原欲分別賢否以示勸懲近因內外文武各衙門考覈各官多係優等劣等甚少故有旨改爲三年彙考據奏各官徇情鑽營等弊且章奏繁擾實於勸懲無裨著議政王貝勒大臣九卿科道會議具奏

○加陣亡福建提督三等侯馬得功爲一等侯予祭葬諡襄武○

己亥諭戶部工部各省設立關稅原期通商以裕國用向因錢糧不敷故定例將抽稅溢額者加級紀錄以示鼓勵遂致各差冀邀

恩典因而騷擾地方困苦商民殊屬不合嗣後稅課俱照定額徵收缺額者處分溢額者加級紀錄之例永行停止其輪流差遣部員亦應停罷並稅課作何徵收著議政王貝勒大臣九卿科道會議具奏○辛丑封承澤親王碩色之子博翁果諾爲惠郡王○癸卯裁六科滿給事中各二漢給事中各三○甲辰議政王大臣等遵旨議覆御史季振宜停止考滿一疏應如所請嗣後各官升轉照舊例論俸部院滿漢官有不稱職者各堂官查參直隸各省文武官有不稱職者該督撫提督不時題參其自陳各官均應停止得旨內外文武官考滿依議停止向有京察之例以改行考滿停止今既停考滿京察之法應否復行著再議以聞○戊申山東巡撫周有德奏請復孤貧口糧舊額以恤無告得旨直隸各省孤貧口糧前因大兵出征錢糧不敷暫裁扣充餉今後仍著照額支給

地方官務期盡心給發俾得實惠違者察出治罪不貸○己酉轉

冀如錫爲工部左侍郎以杜鴛祐爲工部右侍郎

原任戶部左侍郎

○庚

戌以太常寺卿推升侍郎過優著停止○福建總督李率奏閩

海廈門各島前已蕩平惟南山鎮海佛潭橋一帶餘孽盤踞總兵

官劉進忠等進剿於三年九月初四日親統官兵陣斬逆賊七千

有奇招撫男婦一萬三千餘名在事有功人員應請議敘下部議

○辛亥議政王大臣等遵旨議覆復舉京察以何年爲始請旨酌

奪得旨自康熙四年起以後每六年將內外官員考察一次○吏

部遵旨議覆欽天監滿洲監正監副同部寺官一體升轉得旨欽

天監事務必須久任乃能習熟不必照別衙門一體升轉如年久

積功加伊應升職銜永著爲例○乙卯調朱之弼爲吏部左侍郎

由戶部調

○是月免浙江慈谿等五縣江西南昌等四十一州縣去年

被災額賦

二月己未廣東潮州總兵官許龍奏舟師直抵碣石逆賊蘇利勢

窮逆屬及偽副將陳耀等就撫獲賊艘九十七隻○壬戌轉艾元

徵爲戶部左侍郎以嚴正矩爲戶部右侍郎原任○癸亥轉郭鳴鳳

爲江南左布政使由廣東右布政使轉○乙丑吏部奏舊例外轉都給事中

以副使道用今都給事中左右給事中散給事中各銜俱已裁去

相應將給事中外轉者俱以僉事道用得旨前此之都給事中與

今之掌印給事中相同仍著以副使道用○己巳平西王吳三桂

奏總兵官李世耀等三年十一月自烏蒙進征水西安坤悉眾來

拒我兵大破之於波羅箐追至法地聖擒安坤蠻方大定下部優

敘又奏本年正月各鎮將勦擒安坤黨羽安如鼎及煽惑安逆之

僞黔陽王皮熊下部議敘○彗星見女宿度○壬申平西王吳三

桂奏官兵進克烏撒土酋安重聖安重坤俱就擒○暹羅國王森列拍臘照古龍拍臘馬噶陸坤司由提呀菩埃遣使入貢○丁丑喀爾喀巴爾布冰圖台吉來歸封爲多羅貝勒○諭吏部兵部廣東逆賊蘇利反叛地方官多罣罪戾今思蘇利以投誠住居內地倉卒叛亂與外來賊寇失於防禦者不同且當蘇利反叛之際該省王及將軍總督提督卽以本省兵力將逆賊剿滅地方蕩平其係蘇利反叛一案凡地方大小各官之罪俱著寬免○戊寅吏部議覆處分敘州府失守各官一案得旨敘州府馬湖府係新闢地方盜賊眾多故將道府各官未經全設止一推官署兩府之事當逆賊侵犯敘州府時署府事霍焜署宜賓縣事董顯各率家丁衙役出城緝捕身受重傷子姪皆被賊殺又旋將失城恢復及逆賊分犯屏山慶符二縣知縣王敬公迎戰東關射死賊鄒學賢身中

五箭知縣沈彪出戰於教場手刃賊方茂伊等俱在寇亂地方尙屬效力有功不應議罪又署道各官星速請發兵馬措運糧米與官兵協力恢復擣穴擒渠此等官員俱應議功今將霍焜等俱議處分未合著一併再議具奏○癸未以盧興祖爲廣東總督由廣東巡○都察院奏浙江山西山東陝西四道添設滿洲御史四從之○丙戌以彗星見詔臣工言闕失○是月免江蘇太倉等五州縣去年被水額賦

三月戊子午刻京師地震有聲○辛卯以星變地震肆赦免順治十八年以前逋賦○以山西去年旱有司不時上聞致饑饉失所詔吏部議罪免晉省積逋及今年賦○金星晝見○壬辰詔州縣收夏秋稅糧毋隔年豫徵以紓民力○甲午以王來任爲廣東巡撫原任郎○免福建鹽課積逋○丙申裁漕儲道○戶部奏凡被

災地方夏災不出六月秋災不出九月各撫具題差官履畝踏勘將被災分數詳造冊結題照分數蠲免但本年錢糧有司畏干考成必已敲撲全完則有蠲免之名而民不得實惠以後被災州縣將本年錢糧先暫行停徵十分之三候題明分數照例蠲免從之○戊戌給事中楊雍建奏戶部議將康熙四年江浙二省運解三年分白糧正耗盡行改折以充兵餉每石照例折徵銀二兩夫米價隨時高下比年江浙之米每石價值七八錢而止今改折二兩加以火耗勒索之費非本色三石不足以完折色之一石且正米之外又有耗辦等米夫船等銀臣愚以爲有本色則有耗辦既已改折矣不應併耗辦而亦折之也有本色則有夫船等銀既已改折矣不應併夫船而又征之也乞敕該撫轉行所屬照時價減徵其溢收者或盡還民間或抵算別項正賦毋使吏胥因緣爲奸並

令該部嗣後勿議改折以累百姓下部確議○以楊天祥爲廣東

右布政使

原任廣東嶺東道

○庚子廣東總督盧崇峻奏水師總兵官張

國勛等自八月至十一月水陸夾剿會新二縣土寇於百峯山七
村古井等處斬獲無算餘孽悉平下部察敘○壬寅先是江南徽
州府新安衛官生楊光先叩閭進所著摘謬論一篇摘湯若望新
法十謬又選擇議一篇摘湯若望選擇榮親王安葬日期誤用洪
範五行下議政王等會同確議至是議政王等逐款鞠問所摘十
謬楊光先湯若望各言己是麻法深微難以分別但歷代舊法每
日十二時分一百刻新法改爲九十六刻又康熙三年立春日候
氣先期起管湯若望謊奏候至其時春氣已應又二十八宿次序
分定已久湯若望私將參觜二宿改調前後又私將四餘中刪去
紫炁又湯若望進二百年麻夫 天祐 皇上麻祚無疆而湯若

望止進二百年麻俱大不合其選擇榮親王葬期湯若望等不用
正五行反用洪範五行山向年月俱犯忌殺事犯重大擬欽天監
監正湯若望刻漏科杜如預五品挈壺正楊宏量麻科李祖白春
官正宋可成秋官正宋發冬官正朱光顯中官正劉有泰等皆凌
遲處死已故劉有慶子劉必遠賈良琦子賈文郁宋可成子宋哲
李祖白子李寶湯若望義子潘盡孝俱斬立決得旨湯若望係掌
印之官於選擇事情不加詳慎輒爾准行本當依擬處死但念專
司天文選擇非其所習且效力多年又復衰老著免死杜如預楊
宏量本當依擬處死但念 永陵 福陵 昭陵 孝陵風水皆
伊等看定曾經效力亦著免死湯若望等並其干連人等應得何
罪仍著議政王貝勒大臣九卿科道再加詳覈分別確議具奏○
禮部右侍郎黃機奏制科取士稽諸往例皆係三場先用經書使

士子闡發聖賢之微旨以觀其心術次用策論使士子通達古今之事變以察其才猷今甲辰科止用策論減去一場似太簡易恐將來士子勦襲浮辭反開捷徑且不用經書爲文則人將置聖賢之學於不講恐非朝廷設科取士之深意臣請嗣後復行三場舊制則士子知務實學主考鑒別亦得真儒以應國家之選從之○丙午太常寺少卿錢綖請擇老成耆舊博通經史者數人出入侍從以備顧問下部知之○辛亥予故原任經略武英殿大學士洪承疇祭葬諡文襄○河南右布政使李本晟以雲南按察使任內錢糧未清令仍回原任○是月免湖廣石首等三縣去年蝗災額賦

夏四月戊午命漢郎中照滿洲蒙古例於員外郎內選才能者補授○增吏部通滿漢字主事一○己未以金僊爲河南右布政使

由郎中遷

○議政王等遵旨再議湯若望杜如預楊宏量潘盡孝及案

內干連人犯等俱責打流徙餘俱照前議得旨李祖白宋可成宋發朱光顯劉有泰俱著卽處斬湯若望杜如預楊宏量責打流徙俱著免伊等旣免其湯若望義子潘盡孝及杜如預楊宏量干連族人責打流徙亦著俱免餘依議○庚申子故原任大學士甯完我祭葬謚文毅○丙寅左都御史郝惟訥奏凡被災地方查勘之後地糧免若干丁銀亦應免若干庶恩澤均沾貧民有更生之望下部知之○戊辰命補授部院卿貳督撫等官仍行九卿科道會推例○己巳安徽巡撫張朝珍因星變求言之詔條奏三事一說事過錢與受財人同罪新例未當一大功以上之親容隱叛犯婦女皆擬流徙於律義有悖一流徙人妻子無罪與犯人同解情有未忍此後願留願去聽從其便下部知之○丙子廣東總督盧崇

峻奏香山縣知縣姚啓聖招撫蛋寇黃起德等四千餘人下部察敘○辛巳以山東濟南等六府旱遣官賑之

五月辛卯以歸州巴東等州縣劇寇初平流民復業者予牛種○丁酉定直隸各省總督報災遲延照巡撫處分例○己亥山東總督祖澤溥以疾求解任允之○辛丑以江南淮安鳳陽直隸大名府旱發粟賑之○癸卯河南總督劉清泰以疾求解任允之○丁未議政王貝勒大臣九卿科道會議吏部奏請裁併督撫一疏得旨湖廣四川福建浙江四省仍各留總督一員貴州總督裁併雲南廣西總督裁併廣東江西總督裁併江南山西總督裁併陝西直隸山東河南設一總督總管三省事其鳳陽巡撫甯夏巡撫南贛巡撫俱裁去伊等應駐何地著確議具奏○庚戌以水西初定給民牛種並發粟賑之○壬子吏部議覆平西王吳三桂奏水西

地有十一則溪應設三府將騰勝的都朵你阿架四則溪設爲一府建府治於比喇將法戈火著木勝架勒四則溪設爲一府建府治於大方將以著則窩雄所三則溪設爲一府建府治於水西城原設分巡畢節道應改爲整飭三府分巡貴甯道兼管永甯赤畢等衛駐紮比喇三府應各設知府一通判一經歷一司獄一儒學教授一內比喇再設推官一承理三府刑名大案其三府應易新名卽令該藩擬定具題從之○癸丑戶部議覆平西王吳三桂奏僞總兵羅大順投誠其原管地方應編入貴州新添衛土田照例科糧從之○是月免山東樂陵等十一州縣去年旱災額賦

六月丙辰朔調朱昌祚爲直隸山東河南三省總督

由福建總督調

○河

南宣武衛世襲一等阿達哈哈番鄭勳國奏乞錄功臣後裔敕部試用兵部議向無襲職入衛之員自請敘用之例不准所請得旨

鄭勛國自願效力著照所請行又此等有世職官員願效力者爾部酌量具奏錄用○戊午免山東今年租賦○庚申以劉景榮爲江南按察使

由河南南汝道遷

○壬戌吏部議覆福建總督李率奏漳

汀地方遼闊請以守漳道仍駐漳州巡建道仍兼轄延平守建道自建甯府改駐汀州兼轄邵武從之○乙丑詔湖廣西山軍前運餉人夫死亡者同居父兄弟給復一年○丁卯以僞永歷下僞荆國公王光興自湖廣施州衛率領僞都督等官四百六十五員兵七千餘名家屬一萬餘人傾心投誠授左都督加太子太保賞賚有差○戊辰免水西額糧招墾成熟後起科○己巳吏部遵旨議覆廣東廣西總督應駐紮肇慶府江南江西總督應駐紮江甯府直隸山東河南三省總督應駐紮大名府山西陝西總督應駐紮西安府其雲南貴州總督駐紮之處令平西王確議適中之地

具題到部再議從之○平西王吳三桂奏雲南省城迤東土酋王耀祖等窺臣遠征水西本年四月竊據新興僭號大慶謀犯省城分遣賊黨王義齊正陷易門攻昆陽河西甯州土酋祿昌賢陷甯州攻江川通海宜良窺澂江府嶠峨縣土酋祿益陷嶠峨僞開國公趙印選攻彌勒龍韜等攻石屏謀犯廣西王朔李世藩等攻臨安府城滇南震動總督卞三元巡撫袁懋功提督張國柱等調兵分路勦捕所至克捷臣聞警回滇四月初七日擒王耀祖於新興破其巢大營城進援易門復其城盡俘其黨王義等分遣左都督何進忠等敗賊於宜良縣之竹子山復甯州祿昌賢已先遁總兵官王輔臣等援彌勒破賊木城九座於彌勒城下擒趙印選副都統高拱宸復嶠峨救出知縣孫衍慶等總兵官趙得勝等解石屏圍龍韜敗去總兵官嚴鎮援臨安土司李阿側遣兵助戰大敗王

朔李世藩臨安圍解其餘州縣城池俱獲保全得旨嘉獎有功人員及土司李阿側下部一併察敘○辛巳命山東及山西大同太原所免今年租已徵者抵明年正賦

秋七月辛卯聘 皇后何舍里氏行納采禮內大臣噶布喇之女也○癸巳禮部奏欽天監衙門厯法通書十本丹書三本易見通書六本並楊光先易見通書六本內有洪範顛倒五行之書應行查毀從之○丙申予故刑部尙書藍拜祭葬○丁酉禁止民人私採人蔘○正黃旗精奇尼哈番鄭世襲奏微臣悔罪歸誠乞賜母子完聚得旨鄭芝龍罪大正法因將伊妻收養鄭世襲知伊父之罪既經投誠其母顏氏著給伊完聚○己亥平南王尙可喜奏廣東饒平總兵官吳六奇老疾不能供職 上念吳六奇有投誠防汎功命其子吳啓豐以副將管廣東饒平總兵官事○己酉吏部

奏康熙三年分山西省額徵錢糧一年內全完請議敘巡撫等官得旨先以山西太原等處地方人民饑饉不豫行奏請賑濟將督撫各官從重治罪時值頒赦從寬留任豈可仍以饑饉地方錢糧全完爲功巡撫布政使俱不准加級太原等處饑饉地方官員亦不准紀錄其未曾饑饉地方官員仍照例紀錄○壬子免長蘆今年竈課○癸丑平西王吳三桂奏逆首祿昌賢據大西山隴箐馬耳山一帶地方左都督何進忠等分兵進剿賊黨大潰四月二十日直搗普蚌山生擒祿昌賢之黨楊道生等下部知之○是月免江南徐州等十州縣旱災額賦

八月甲寅朔減廣西鹽引額十之六○平西王吳三桂奏本年四月土酋那烈等率賊數千三攻元江府知府潘士秀遊擊武榮元等督兵守禦保全邊城五月內總兵馬維興等進剿邱北大挫兇

錄得旨嘉獎下部察敘○戊午以繆正心爲湖廣右布政使

由山西

前道

○丁卯平南王尙可喜奏蜚逆夥黨竄據東涌海島游擊佟

養謨等調兵奮剿擒賊魁譚琳高又蜚戶黃明初等駕船在馬流門一帶接濟蜚逆糧米拖沙喇哈番舒雲護等領兵梭剿擒斬賊黨四百三十餘名○己巳諭禮部前於順治五年九月內有旨纂修明史因缺少天啓甲子丁卯兩年實錄及戊辰年以後事蹟令內外衙門速查開送至今未行查送爾部卽行內外各衙門將彼時所行事蹟及奏疏諭旨舊案俱著查送在內部院委滿漢官員詳查在外委該地方能幹官員詳查如委之書吏下役仍前因循了事不行詳查被旁人出首定行治罪其官民之家如有開載明季時事之書亦著送來雖有忌諱之語亦不治罪爾部卽作速傳諭行○庚午左都御史郝維訥奏犯賊人員雖遇恩赦止可援例

免罪不當復職另補下部議行○兵部議敘康熙二年進取金門
廈門康熙三年攻克銅山等處功加靖南王耿繼茂俸銀一千兩
賞海澄公黃梧大蟒貂裘鞍轡等物加黃順等二十人爲左都督
施琅等六人爲右都督陳斌等十一人爲都督同知黃英等十一
人爲都督僉事總兵楊富以進援中傷落水復出投拜他喇布勒
哈番准襲二次各將士加等授職有差○雲南巡撫袁懋功奏滇
省地勢高下絕少平曠丈量地畝雖一州一邑經年累月難以報
竣請停止京官踏勘之差從之○己卯奉天府立學校置生員○
辛巳增盛京工部郎中一○壬午以石申爲刑部左侍郎管右侍
郎事

原任吏部左侍郎

○是月免直隸開州等十一州縣旱災額賦

九月己丑福建總督李率奏水師右路總兵官杜永和連破海
寇斬僞將烏角車等○辛卯 上大婚冊何舍里氏爲 皇后○

癸巳以大婚禮成頒詔天下○戊申加上太皇太后徽號曰
昭聖慈壽恭簡安懿章慶敦惠溫莊太皇太后 皇太后徽號
曰 仁憲恪順皇太后頒詔加恩中外○禁鈔關額外苛索○是
月免陝西肅州等五州衛江南潁州等六州縣衛直隸滄州等六
州縣衛被災額賦有差

冬十月癸丑朔喀爾喀台吉都西希雅布阿爾納嘎爾瑪兄弟三
人率眾二千餘人投誠封都西希雅布貝子授阿爾納嘎爾瑪一
等台吉○丁巳裁廣東廣州衛廣海衛香山所新甯所大鵬所守
備千總等缺○癸亥 上幸南苑行圍○己巳予故原任工部侍
郎李呈祥祭葬○御史顧如華奏伏讀 上諭禮部廣授前明天
啓以後事蹟以備纂修明史查明史舊有刊本尙非 欽定之書
且天啓以後文籍殘毀苟非廣搜稗史何以考訂無遺如三朝要

典同時尙論錄樵史兩朝崇信錄頌天臚筆及世族大家之紀錄
高年逸叟之傳聞俱宜採訪以備考訂至於開設史局尤宜擇詞
臣博雅者兼廣徵海內宏通之士同事纂輯然後上之滿漢總裁
以決去取纂成全書進呈 御覽成一代信史章下所司○甲戌

上還京師○贈故少傅兼太子太傅左都督廣東饒平總兵官
吳六奇少師兼太子太師予祭葬諡順恪○己卯御史李宗孔奏
皇上改八法之條以五等爲殿最嗣因奉行不善停止考滿一
槩序俸臣謂考滿可停而勸懲大典不可不行查見行事例惟重
緝逃人完舊欠兩事天下之大有逃欠者十不及一彼無逃無欠
地方官雖有操守才幹不爲表揚爲民牧者孰肯潔己自振乎至
參奏止將衰老微員塞責 上諭已極嚴明諸臣未見仰體請敕
各省督撫據實舉劾清勤實著者亟爲薦舉以示風勵貪惡敗類

者卽爲糾參以儆無良庶考滿雖停而朝廷賞罰仍嚴於吏治民生大有裨益下部議○庚辰浙江總督趙廷臣奏鄭逆僞左都督朱英自澎湖率眾投誠○是月免河南安陽等二縣陝西狄道江南江都水災額賦

十一月戊戌授四川逆賊賀珍下投誠僞總兵賀福全等八員爲副將僞署總兵王繼祖等二十四員爲參將僞參將李進忠等十五員爲游擊僞游擊崔一祿等八員爲都司僉書僞都司向正吉等二十二員爲守備僞守備蒲加隆等三員爲守禦所千總並給全俸賞賚有差○乙巳吏部議覆御史李宗孔奏旣停外官考滿之法宜嚴督撫舉劾之典查薦舉已經停止若復舉行則事體繁雜臺臣所請每歲督撫薦舉之處應無庸議至地方官有大貪大惡者許令不時糾參得旨依議近日督撫止將衰老微員糾參塞

責未見有大貪極惡奏聞者豈所屬果無其人皆由上官徇庇故也嗣後有大貪大惡害民之官責令督撫指名糾參有仍前徇庇者一併從重治罪○戊申吏部議覆江南江西總督郎廷佐奏鳳陽巡撫缺已裁所屬廬鳳二府滁州和州請分隸安徽巡撫管理淮揚二府及徐州請分隸江甯巡撫管理從之○是月免直隸永年等七縣水災額賦仍發粟賑之免浙江安吉等九州縣衛江南山陽陝西河州衛河南武安江西南昌等四十二州縣被災額賦十二月壬子朔諭吏部等衙門總督巡撫皆係倚任重臣必秉公清正爲下官表率使民生得所方副倚任之意乃督撫反以餽送禮物爲常例稱某州縣上等某州縣下等按定數目公然收受州縣官員俱自民間派取以致百姓困窮嗣後各督撫如再不改此等弊端仍然踵行著科道官採訪指名糾參定行從重治罪若司

道府廳各官仍取之州縣州縣各官仍私派百姓者著督撫不時嚴察參奏若徇情不行參奏經科道官糾參或旁人出首將不糾參之督撫一併從重治罪爾部院通行直隸各省曉諭○轉金鉉爲江南左布政使由山西右布政使轉以安世鼎爲福建按察使由江南蘇松常道遷佟養鉅爲廣東按察使由嶺東道遷○己未諭禮部本朝定鼎以來故明朱氏宗族歸順有官品者給與房地奴僕俸祿恩養無官品者俱照民人歸農令其得所其故明各帝陵墓世祖章皇帝有旨設人看守以時祭祀不絕此皆昭示恩養寬仁之意近有朱氏無知之徒改易姓名隱藏逃避致生事端被人訐告既累本身又負國家恩養爾部行文直隸各省督撫刊示曉諭如朱氏宗族改易姓名隱藏逃避者俱令回籍各安生理勿仍前疑懼有負朕浩蕩之恩爾部卽通行傳諭○丁卯諭兵部近見各省奏報凡有賊寇

用兵撲剿皆係干把總等官領兵前往提督總兵副將參將遊擊等官率兵前往者甚少我朝向來用兵皆由主帥躬親戰陣指授故能戰勝攻取所向無不克捷今直隸各省提鎮等官凡遇寇賊不親身領兵前往差委末弁此係相沿故明陋習貽誤地方自圖安逸以後凡有寇賊該省駐防將軍提督總兵等官務須相酌機宜親往剿滅如仍前規避偷安差委末弁充數致誤軍機必從重治罪爾部卽通行嚴飭○庚午江南江西總督郎廷佐奏溧陽縣民顧起龍等獲玉璽篆文人心惟急道心惟微惟精惟一允執厥中十六字遺官齋進命貯內庫賞顧起龍等銀各五十兩齋璽筆帖式三員各馬一匹○乙亥轉杜篤祐爲工部左侍郎以楊運昌爲工部右侍郎

原任禮部右侍郎

○己卯兵部議覆廣東鎮海將軍王國

光奏鄭逆賊夥向泊銅山炫鐘等處後駕船七十餘隻衝入甲子

所港口挽泊得旨設立水師提督總兵官等原爲防禦海寇今福建銅山炫鍾等處賊船挽泊提鎮官等並未帶領官兵撲剿至賊船飄往廣東並未跟蹤追殺又不豫檄廣東各官在前截殺後賊船直衝入甲子所港口挽泊廣東水師各官亦未迎截如此則設立水師提督何用以後賊船再至提鎮官如不親領官兵撲滅賊遁不跟蹤追剿及不豫檄附近省分截殺仍沿舊習若罔聞知定行治罪○是月免直隸霸州等三十七州縣衛湖南益陽等二十五州縣衛陝西鎮原等三州縣廣西臨桂等五州縣被災額賦有差○是歲朝鮮琉球暹羅入貢○人丁戶口一千九百三十一萬二千一百一十八田地山蕩畦地五百三十八萬一千四百三十七頃五十四畝徵銀二千一百八十一萬六千九百八十五兩有奇米豆麥六百一十五萬六千七百六十五石有奇草二百二十

九萬四千五百六十三束茶十五萬八千三百四十七引行鹽二百三十二萬六千二百五十二引徵課銀二百七十五萬一千二百四十三兩有奇鑄錢二萬九千八百六十五萬二千四百有奇